

Projek atasi banjir kilat di Kajang

SHAH ALAM - Kerajaan negeri menerusi Jabatan Pengairan dan Saliran (JPS) Selangor merangka pelan jangka pendek dan panjang bagi menamatkan episod banjir kilat di Kajang.

Exco Infrastruktur dan Kemudahan Awam, Permodenan Pertanian dan Industri Asas Tani, Zaidy Abdul Talib berkata, JPS Selangor sudah dan akan melaksanakan kerja-kerja di tapak iaitu pembaikan tebing Sungai Jeluh di Taman Sri Jelok dengan kos RM20,000 yang siap pada November 2014.

"Penyelenggaraan tebing dan pembaikan 'flap gates' dengan kos RM40,000 siap pada November lalu, pembinaan 'Flood Wall' sepanjang 54 meter dengan kos RM50,000 siap pada Disember 2014 dan pembaikan selekoh S dengan kos RM1.5 juta.

"Proses tender dan kerja-kerja akan dilaksanakan pada 2015 dan pihak JPS merancang melaksanakan kerja untuk pelan jangka pendek," katanya dalam satu kenyataan, semalam.

Menurutnya, pelan tersebut meliputi Rancangan Tebatan Banjir Sungai Jeluh (Fasa 3) dengan kos RM3 juta, pembinaan sambungan 'Flood Wall' dari Jambatan

JPS Pasar ke Jambatan JKR Jalan Bukit sepanjang 50 meter, penyelenggaraan kolam takungan di Taman Saujana Impian dengan dua nos dan di Taman TTDI Kajang dengan satu nos, pembinaan 'Gross Pollutant Trap' (GPT), penyelenggaraan sistem saliran bandar dan pembinaan sistem amaran banjir dengan anggaran keseluruhan berjumlah RM5.5 juta.

Katanya, beberapa pelan jangka panjang dikeluarkan antaranya menaik taraf kolam takungan seluas 4.5 ekar di Penjara Kajang, Rancangan Tebatan Banjir Sungai Jeluh (Fasa 4), menaik taraf jambatan dan utiliti, pembinaan struktur kawalan air, dan menaik taraf sistem saliran bandar dan GPT.

Beliau yang juga Adun Taman Templer berkata, isu banjir kilat yang berulang di Selangor, khususnya di kawasan Kajang menyebabkan kawasan premis perniagaan dan Pasar Kajang ditenggelami air sedalam satu meter sehingga mengganggu aktiviti harian dan kehidupan sosial penduduk.

"Banjir kilat berlaku sekali pada 2 Disember 2011 dan tiga kali pada tahun 2014 dalam tempoh 30 minit hingga dua jam," katanya.